

deretur in secundo, tertio, quarto &c. momento sui esse, ita ut dicatur *durare* (quo respectu dicitur conservari)

7. Duratio quippe & existentia ratione tantum distinguuntur, quia in re idem sunt esse & porro esse. Atque ita etiam idem sunt creari & conservari, quoniam non tendunt ad terminos diversos, uti calefactio ad calorem & particularum motum, frigefactio ad frigus & particularum quietem; verum ad unum eundemque terminum diversimodè considerata.

8. Si quis autem omnino velit creationem & conservationem tanquam *in Deo* considerare, qua ratione nihil aliud notabunt quàm efficacem & æternam Dei volitionem, ut in tempore existerent & in existendo perseverarent res omnes, multò adhuc minorem habebit rationem, ullam inter creationem & conservationem diversitatem statuendi, quia omnia quæ in Deo sunt, sunt ipse Deus, qui unus semper est & idem & in quo sunt omnia unum, quemadmodum ex iis quæ de Simplicitate Dei infra dicemus uberius cognoscetur.